

四庫全書

子部

欽定四庫全書

子部
冊府元龜卷二百
七十七至
七十八

詳校官中書臣王鵬

員外郎臣牛稔文覆勘

總校官庶吉士臣何思鈞

校對官助教臣羅萬選

謄錄監生臣姚培雯

欽定四庫全書

冊府元龜卷二百七十七

宋

王欽若等撰

宗室部

褒寵第三

後魏陳留桓王虔昭成帝孫也武力絕倫與慕容垂戰
沒道武追惜傷勳者數焉配享廟庭封其子悅為朱提
王悅外和內狠道武以桓王死王事特加親寵

秦明王翰子儀道武之孫為左丞相從征討有功太武

之初育也道武喜夜召儀入曰卿聞夜喚乃不怪懼乎儀曰怪則有之懼實無也帝告以太武生因賜儀御馬御帶縑錦等道武以儀器望待之尤重數幸其第如家人禮

中山王纂秦明王翰孫初道武養於宮中太武踐祚除定州刺史封中山公進爵為王賜步挽車以優異之

常山王遵子素道武之曾孫明元從母所生特見親寵陳留王虔兄覬性嚴重少言道武嘗敬之雅有謀策從平中山以功賜爵蒲城侯平盧太守特見寵厚給鼓吹

羽儀禮同岳牧莅政以威信著稱

陽平王熙道武子明元治兵於東部詔熙督十二軍校閱甚得軍儀明元嘉之賞賜隆厚泰常六年薨明元哀慟不已賜溫明秘器禮物備焉

河間公興都初封樂城子獻文初以子東陽王丕貴重進爵樂城侯謝老歸家帝益禮之賜几杖服物致膳於第其妻婁氏為東陽王太妃卒追贈定州刺史河間公任城王雲景穆之子為征東大將軍徐州刺史以太妃

蓋氏薨表求解任百姓所遺錢貨一無所受顯祖聞而
嘉之復拜侍中賜錢千貫羊千口出為雍州刺史州民
頌之者千人文明太后嘉之賜帛千匹薨於州喪至京
師車駕親臨哭

北海王詳獻文之子孝文自雒北巡詳嘗與侍中彭城
王勰並在輿輦陪侍左右至文成射銘之處詔詳與侍
臣皆試射遠近諸人皆去一二十步唯詳箭及之孝文
嘉之拊掌欣笑遂詔勒銘親自為製車駕南伐行中領

軍留守給鼓吹一部甲仗三百人

咸陽王禧獻文之子太和中為冀州刺史孝文餞於南郊來朝京師將還州親餞之賦詩叙意人為司州牧都督司豫荆郢雒東荆六州諸軍事詔以禧元弟之重食邑三千戶其餘五王皆食二千戶

趙郡靈王幹獻文之子孝文南伐以幹為車騎將軍都督關右諸軍事給銅虎符十別賜詩書班師遷雒除都督冀定瀛三州諸軍事征東大將軍冀州刺史開府如

故賜雜物五百段又密賜黃金十斤孝文親餞於近郊
後轄司州牧車駕南討詔幹都督中外諸軍事給鼓吹
一部甲士三百人出入殿門太和二十三年薨給東園
秘器斂服十五稱贈帛三千疋陪葬長陵

廣陵惠王羽獻文之子太和中進號衛將軍征東大
將軍開府青州刺史孝文幸羽第與諸弟言曰朕昨親
受人訟始知廣陵之明了咸陽王禧曰臣年為廣陵兄
明為廣陵弟孝文曰我為汝兄汝為羽昆汝復何恨親

餞之華林園宣武即位面受司徒薨於府宣武親臨哀
慟給東園溫明秘器朝服一具衣一襲錢六十萬布一
千疋蠟三百斤大鴻臚護喪事大殮帝親臨之舉哀于
都亭贈使持節侍中驃騎大將軍司徒公冀州刺史給
羽葆鼓吹班劍四十人及葬帝親臨送

彭城王勰獻文之子孝文南討漢陽假勰中軍大將軍
加鼓吹一部及為中書令孝文宴大臣於清徽堂日宴
移於流化池芳林之下孝文曰向宴之始君臣肅然及

將軍觴也而流景將頽竟不盡適戀戀餘光故重引卿
等因仰觀桐葉之茂曰其桐其椅其實離離愷悌君子
莫不令儀今林下諸賢足敷謌詠遂令黃門侍郎崔光
讀暮春羣臣應詔詩至總詩孝文乃為之改一字曰昔
祁奚舉子天下謂之至公今見總詩始知中令之舉非
私也總對曰臣露此拙方見聖朝之私賴蒙神筆賜刊
得有令譽孝文曰雖雕琢一字猶是玉之本體總曰臣
聞詩三百一言以蔽今陛下賜刊一字足以價等連城

後從孝文征沔北大破梁將崔慧景孝文不豫內侍醫
藥孝文有瘳車駕還京會百僚於皇極堂行飲至策勲
之禮命舍人宣旨勰翼弼六師纂戎荆楚沔北之勲每
毗廟筭從討新野有尅城之謀受命鄧城致大捷之効
功為羣將之最也別當受賞不替厥庸孝文謂勰曰吾
與汝等早罹艱苦中逢契闊每謂情意隨事而踈比纏
患經歲危同寒葉非汝孔懷情敦忠孝孰能動止躬親
必先藥膳每尋此事感恩殊遠勰悲泣對曰臣等宿遭

不天酷恨長世賴陛下撫育得參人伍豈謂上靈無鑒
復使聖躬違和萬國所懸蒼生繫望寢興之勞豈申荼
蓼以破慧景等勲增邑五百戶又詔曰朕形疲稚年心
勞長歲積思成疴頓發汝頰第六弟總孝均周弟誠侔
姬旦遺食捨寢動止必親敦醫勸膳誠力俱竭永言保
康實賴同氣又秉務緝政百司是憑網維折衷萬揆獲
濟撫師於霖浩之辰處戎於荐逼之日安外靜內功濟
大道侍省之績可以孔懷無褒翼亮之勤實乃勲高社

稷宜有酬賞以旌國功可增邑一千戶總辭曰臣受遇
緣親榮枯事等以此獲賞深乖情願乞追成旨用息謗
言詔曰汝在私能孝處公必忠比來勤憂足布朝野但
可祇膺尋以總為司徒太子太傅侍中如故宣武即位
以有功任宰輔總固讓宣武雖許之猶逼以外任尚書令
王肅等奏臣等聞旌功表德道貴前王庸勲親親義高
盛典是故姬旦翼周光宅曲阜東平宰漢罷絕列藩彭
城王勰景思內昭英風外發協廓乾規掃氛漢沔屬先

帝在天鳳旌旋旆靜一六師肅寧南服登聖皇於天衢
開有魏之靈祐論道中鉉王猷以穆七德丕宣九功在
詠臣等參議宜增邑一千五百戶詔曰覽奏倍增殞絕
未足以上酬勲德且可如奏總頻表固讓宣武與總書
曰恪奉辭暨今悲戀哽咽歲月易遠便迫暮冬每思聞
道奉承風教父既辭榮閑外無容頓違至德出藩累朔
荒馳實深今遣主書劉道斌奉宣悲戀願父來望必當
留京展洩哀窮指不云遠總乃朝於京師景明初齊豫

州刺史裴叔業以壽春內屬詔總都督南征諸軍事餘如故與尚書令王肅迎接壽春詔曰五教治樞古難其選自非親賢兼切莫應斯舉王以明德懋親任屬保傳出居藩陝入御衮章內外克諧民神攸屬今董率戎麾威號宜重可復授司徒以光實望又詔總以本官領揚州刺史

廣川剛王諧莊王畧之子太和中薨將大殮孝文素服深衣哭之入室哀慟撫尸而出詔贈諧武衛將軍及葬

孝文親臨送之

東陽王丕孝文嗣位累遷太尉錄尚書事淮南王他淮陽王尉元河東王苟頽並以舊老見禮每有大事引入禁中乘步挽杖於朝進退相隨文明太后為王獻造宅故亦為丕造甲第第成帝后幸之率百官文武享燕焉使尚書令王獻宣詔賜丕金印一紐又特賜金券帝北巡狩丕留守賜所乘車馬往來府省帝幸平城子隆謀逆丕免死為太原百姓丕年垂八十猶自平城力載隨駕至雒留雒陽帝

每遣左右慰勉之乃還晉陽孝文沒丕自并來赴宣武引見之以丕舊老禮有加焉尋勅留雒陽後宴于華林都亭特令二子扶侍坐起丕歷仕六世年垂七十位極公輔而還為庶人然猶心戀京邑不能自絕人事詔以丕為三老襲常山宣王忠字仙德孝文時累遷右僕射賜爵城陽公太和四年疾篤辭退養病於高柳輿駕親送都門之外羣僚友臣執別者莫不涕泣及卒皆悼之命有司為立碑銘淮南王他陽平王熙之子太和初拜侍中轉征西大將

軍遷司徒賜安車几杖入朝不趨太和十二年薨孝文
有事宗廟始薦聞他薨為之廢祭輿駕親臨慟詔有司
監護喪事

南平王渾陽平王熙之第二子太武器其藝能嘗引侍
左右賜馬百匹子霄嗣霄好直言正諫孝文特垂欽重
詔曰自今奏事相稱可去姓名唯南平王一人可直言
某封太和十七年薨賜朝服冥衣一襲東園第一秘器
絹千匹孝文總哀臨霄喪哀動左右醮不舉樂贈衛將

軍定州刺史賜帛五百疋

江陽王繼南平王霄第二子子又先納靈太后妹及太后臨朝數與孝明幸繼宅置酒高會班賜有加尋遷侍中驃騎大將軍儀同三司特進領軍如故徙封京兆王繼疾患積年就養于家每至靈太后與孝明遊幸於外時令扶入宮守禁內及節慶宴饗皆力疾叅焉特轉太保侍中加後部鼓吹孝明詔曰至節嘉辰禮有朝慶親尊戚老理宜優異王位高年宿可依齊郡王簡故事朝訖

引坐免其拜伏轉太傅侍中頻讓不許大官給酒饌供
賓客又詔令乘步挽至殿庭兩人扶侍禮秩與丞相高
陽王相埒後除使持節侍中太師大將軍錄尚書事大
都督節度西道諸軍出師之日車駕臨餞傾朝祖送賞
賜萬計繼啟求還復江陽詔從之

繼長子又娶靈太后妹孝明初以侍中領軍輔政威振
於內外乃封其子亮平原郡開國公食邑一千戶及拜
孝明御南門臨觀并贈賜御馬帛千疋

廣陽王嘉簡王建閭子宣武時拜衛大將軍尚書令除儀同三司嘉好飲酒或沉醉在宣武前言笑自得無所顧忌帝以屬尊年老嘗優容之與彭城北海高陽諸王每入宴集極懼彌夜數加賞賜帝亦時幸其第

廣陵侯衍陽平王新成之次子為徐州刺史至州病重孝文勅徐成伯乘傳療疾差成伯還帝曰卿定名醫賚絹三千匹成伯辭請受一千帝曰詩云人之云亡邦國殄瘁以是而言豈惟三千匹乎其為帝所重如此

南安惠王禎性忠謹事母以孝聞孝文賜帛千匹以褒之徵赴講武

禎子英字虎兒時梁平三關戍宣武詔曰知賊城已下復克三關展威闢境聲略宣振公私稱泰良以欣然將軍淵規內斷忠謀外舉受律揚旌克申廟筭雖方叔之制蠻荆召虎之掃淮浦匹茲蔑如也新州初附宜廣經略想善檢督必令周固有所委付然後凱旋耳

安定靖王休太和中為大司馬從駕幸鄴命休率從駕

文武迎家於平城孝文親餞休於漳水之北十七年春
與太保齊郡王簡並蠲朔望之禮十八年休寢疾高祖
幸其第流涕問疾中使醫藥相望於路薨贈帛三千疋
自薨至殯車駕三臨孝文至其門改服褻衰素笄加經
皇太子百官皆從行弔禮及將葬又贈布帛二千疋詔
假黃鉞加羽葆鼓吹虎賁班劍六十三人悉準三老尉
元之儀孝文親送出郊慟哭而返諸王恩禮莫比焉宣
武世配享廟庭

任城文宣王澄從孝文征南至懸瓠以篤疾還京駕餞之汝墳賦詩而別常山刺史穆泰反以澄行州事遂授節銅虎竹使符御仗左右孝明世為司空侍中西域之厭達波斯諸國各因公使並送澄駿馬一匹澄請付公僕以充國閑詔曰王廉貞之德有過楚湘可勅付殿以成君子大哉之美後為司徒尚書令薨詔百僚會喪贈假黃鉞使持節都督中外諸軍事太傅領太尉公加以殊禮脩九錫依晉大司馬齊王攸故事謚曰文宣澄

之葬也凶飾甚盛靈太后親送郊外停輿悲哭哀動左右百官會赴千餘人莫不歔歔當時以為哀榮之極澄弟嵩為安南將軍揚州刺史累戰有功後為蒼頭李太白所害宣武為嵩舉哀於東堂賻絹一千匹贈車騎將軍領軍

澄子順為左僕射爾朱榮之亂為鮮于康奴所害家徒四壁無物殮尸止有書數千卷而已門下通事令史王才達裂裳覆之莊帝還宮遣黃門侍郎山偉巡喻京邑

偉臨順喪悲慟無已既還莊帝恠而問曰黃門何為聲
散偉以狀對莊帝勅侍中元祉曰宗室亡非一不可周
瞻左僕射清苦之節死乃益彰特贈絹百疋餘不得為
例贈驃騎大將軍尚書令司徒公定州刺史謚曰文烈
高陽王雍獻文之子為驃騎大將軍司州牧宣武時幸
雍第盡家人之禮孝明初詔入居太極西栢堂諸決大
政給親信二十人又詔雍為宗師進太傅侍中領太尉
公王如故別勅將作營國子學寺給雍居之靈太后詔

雍乘步挽入掖門又以本官錄尚書事雍頻表辭遜優
答不許詔侍中敦諭孝明覽政詔雍乘車出入大司馬
門進位丞相給後部羽葆鼓吹倍加班劍催令速拜詔
雍依齊郡順王簡太和故事朝訖引坐特優拜伏之禮
孝昌初詔曰比相府弗開陰陽未變王秉哲居宗勲望
隆重道庇蒼生威被華裔體國猶家匪躬在節可開府
置佐吏又詔曰丞相高陽王道德淵廣明允篤誠儀刑
太階垂風下國實所以予違汝弼致治責成宜班新制

宣之遐邇其州郡先上司徒公文悉可改上相府施所符告皆亦如之後遇害於河陰贈假黃鉞相國

城陽王徽為安西將軍秦州刺史詔書旦至夕發徽以將之秦部請詣闕恭授仍表啓固陳請不之職改授輔國將軍加度支尚書元顥入雒徽從莊帝北巡及車駕還宮以與謀之功除侍中大司馬太尉公加羽葆鼓吹增邑通前三萬戶

章武王融與葛榮戰敗見殺孝明舉哀於東堂賜東園

秘噐朝服一具綵二千八百段尋以融死事進贈司徒
加後部鼓吹

襲常山王素孫暉孝明世為尚書令攝吏部選事神龜
元年卒賜東園秘噐贈使持節都督中外諸軍事司空
公將葬給羽葆鼓吹班劍二十人羽林二百二十人

趙郡王謚靈王幹之子除都宮尚書加安南將軍正光
四年薨給東園秘噐朝服一具衣一襲賻帛五百匹

謚弟惠羽林監直閣將軍早卒賻帛五百匹贈鎮遠將

軍恒州刺史

武川鎮將軍蘭子志為雒陽令與御史中尉爭路帝謂
邢巒曰此兒竟可謂王孫公子不鏤自雕巒曰露竹霜
條故多勁節非鸞則鳳其在本枝也

武昌王鑿宣武時為征虜將軍徐州刺史尅梁角城帝
詔鑿曰知摧角城威謀展稱良以欣然此城襟帶淮許川路
衝要自經昔筭未能尅之蟻固積紀每成邊害將軍淵
規潛運妙略克宣闕境尅城功著不日據要扼喉津徑

勢阻可謂勲高三捷朕甚嘉焉守御諸宜善以量度宣
慰之使尋當別遣

上黨王天穆以平邢杲之亂莊帝加太宰羽葆鼓吹增
邑通前七萬戶

北齊廣平公盛神武從叔祖也歷位太尉天平三年薨
贈假黃鉞太尉太師錄尚書事

平秦王歸彥神武族弟天保中以討侯景功封為長郡
公除領軍大將軍領軍加大自歸彥始也文宣誅高德

政金寶財貨悉以賜之及為司空時孝昭將入雲龍門都督成休寧列拒而不內歸彥諭之然後得入進向栢閣永巷亦如之孝昭踐祚以此彌見優重每入常在平原王段韶上以為司空兼尚書令齋宮內唯天子紗帽臣下皆戎帽特賜歸彥紗帽以寵之

平陽王淹神武子皇建初為太傅與彭城王攸河間王孝琬並給仗身羽林百人

彭城王洸神武子為太師錄尚書事河清三年車駕巡

幸汝留鄴為羣盜所害贈假黃鉞太師太尉錄尚書事
給輜輶車

襄城王洸神武子天保三年薨乾明元年贈假黃鉞太
師太尉錄尚書事

高陽王湜神武子廢帝初薨乾明初贈假黃鉞太師司
徒錄尚書事

馮翊王潤神武子為太師太宰薨贈假黃鉞左丞相

瑯琊王儼武成第三子也為領軍大將軍領御史中丞魏

氏舊制中丞出清道與皇太子分路行王公皆遙住車去牛頓軓於地以待中丞過其或遲違則赤捧捧之自都鄴後此儀浸絕武成欲雄寵儼乃使一依舊制儼初從北宮出將上中丞凡京畿步騎領軍之官屬中丞之威儀司徒之鹵簿莫不畢備帝與后在華林園東門外張幕隔青紗步障觀之觀者傾京邑儼嘗在宮中坐含光殿以視事

後周晉公護太祖兄子為大冢宰明帝立拜太師賜路

車冕服又為雍州牧并賜金石之樂武帝保定三年詔
曰大冢宰晉國公智周萬物道濟天下所以克成我帝
業安養我蒼生况親則懿昆任當元輔而可同班庶品
齊位衆臣自今詔誥及百司文書並不得稱公名以彰
殊禮護固讓五年詔曰先宅曲阜魯用郊天之樂地處
參虛晉有大蒐之禮所以言時計功昭德紀行使持節
太師都督中外諸軍事柱國大將軍大冢宰晉國公體
道居貞舍和誕德地居戚右才表棟隆國步艱難寄深

夷險皇綱締構事均休感故以迹冥殆庶理契如仁今
文軌尚隔方隅猶阻典策未備聲名多闕宜賜軒懸之
樂六佾之舞

趙王招陳王純越王盛滕王道皆文帝子靜帝即位加
招等八朝不趨劍履上殿

代王達字度斤突性果決善騎射初封代公出為荊州
刺史在州有政績高祖手勅褒美之高祖東伐以為將
軍摠管齊淑妃馮氏尤為齊後主所幸齊平帝以達不

邇聲色以馮氏賜之靜帝即位詔與趙王招等入朝不趨劍履上殿

蔡公廣太祖兄邵惠王顥孫也廣母李氏以廣患彌年憂而成疾因此致卒廣乃以毀薨武帝素服親臨百寮畢集故吏儀同李充信等上表褒述申其宿志庶存儉約詔曰昔河間才藻追叙于中尉東海謙約見稱於身後可斟酌前典率繇舊章使易箒之言得申遺志黜殯之請無虧令終於是贈本官加太保隴右十四州諸軍

事秦州刺史謚曰文葬於隴右所司一遵儉約之典
廣陵公孝伯與武帝同日生嘗謂曰公於我猶漢高與
盧縮也賜以十三環金帶自是常侍左右出入卧内朝
務皆預焉

隋安德王雄初進封廣平王改封清漳王仁壽初高祖
曰清漳之名未允聲望命職方進地圖上指安德郡以
示羣臣曰此號足以名德相稱於是改封安德王

遂寧子達開皇中為鄴鄭趙三州刺史俱有能名平陳

之後四海大同帝差品天下牧宰達為第一賜雜綵五百段加以金帶擢拜工部尚書

秦王俊為并州總管三十四州軍事頗有令聞高祖聞而大悅下書獎勵焉

齊王暕煬帝第二子大業初為豫州牧俄而元德太子薨朝野注望咸以暕當為嗣文帝勅吏部尚書牛弘妙選官屬公卿繇是多進子弟明年轉雍州牧尋徙河南開府儀同三司元德太子左右二萬餘人悉隸於暕寵

遇益隆自樂平公主及諸戚屬競來致禮百官稱謁填
咽道路

唐淮安王神通高祖從父弟也為河北道行臺尚書左
僕射太宗即位是月甲戌詔曰褒崇賢戚有國彛典厚
秩清階式隆朝望左武衛大將軍上柱國淮安王神通
宗室之長德器優弘締構之初早樹勳績右武衛大將
軍上柱國燕郡王藝夙著嘉庸志懷彊毅久司戎禁見
稱貞確宜加榮寵式允具瞻並可開府儀同三司四年

薨太宗為之廢朝鴻臚護喪事贈司空謚曰靖

淮陽王道玄高祖從父兄子也從太宗擊宗金剛先登
陷陣時年十五太宗壯之賞物千段後擊劉黑闥戰沒
太宗每追痛之嘗從容謂侍臣曰道玄始終從朕深入
賊陣所向必尅意常企慕所以每陣先登蓋學朕也惜
其幼少力不遂心及於難平後以其弟武都王道明徙
封於淮陽國

河間王孝恭高祖從父兄子也武德二年授信州總管

承制拜假蕭銑平高祖大悅拜孝恭荊州大摠管使畫
工貌而視之及平輔公柘璽書褒賞賜甲第一區女樂
二部奴婢七百人金寶珍翫甚衆授東南道行臺尚書
右僕射太宗甚加親待諸宗室中莫與比焉貞觀十四
年暴薨太宗素服舉哀哭之甚慟

江夏王道宗高祖從父兄子為吏部尚書太宗討高麗
為前鋒大破賊兵太宗至深加賞勞賜奴婢四十人道
宗在陣損足太宗親為之針賜以御膳

濟北公城河間王孝恭弟也為尚書左丞貞觀十年夏五月幸其第敦親親也

襄邑郡王神符貞觀三年為宗正卿後以疾辭位歸第拜光祿大夫每月別給羊酒太宗將幸九成宮就第問疾賜以縑帛又令乘小輿引見紫微殿以其脚疾遣三衛輿之而升

齊王元吉高祖子武德四年太宗討竇建德於滎陽留元吉與屈突通圍王世充於東都世充出兵拒戰元吉

設伏擊破之斬首八百級生擒其大將軍樂仁昉甲士千餘人世充平拜司空加賜袞冕之服前後部鼓吹樂二部班劍二十人黃金二千斤與太宗各聽三鑪鑄錢以自給九年詔曰三台望重仰叶辰曜五教任隆俯安邦國實資懿德式寄親賢侍中并州大都督左衛大將軍上柱國齊王元吉噐量凝邈風神爽邁徽猷夙著嘉譽早隆出莅方岳政績兼懋入侍帷宸獻納允屬推轂聞外脩展勲庸職司禁旅戎章以輯變理之任朝典攸宜

可司徒餘如故

鄧王元亨高祖子貞觀二年為金州刺史及之藩太宗以其幼小甚思之中路賜以金盞遣使為之設宴

徐王元禮高祖子貞觀十七年為絳州刺史以善政聞太宗降璽書勞勉賜以錦綵

鄭王元懿高祖子總章中為絳州刺史元懿頗好學數斷大獄甚有公平之譽高宗特降璽書褒美賜物三百段

舒王元名高祖子元名性高潔矜莊門庭清肅嘗誠其子豫章王亶等曰藩王所乏者不慮無錢財官職但勉行善事忠孝持身此吾志也及亶為江州刺史以善政聞高宗手勅褒美元名以賞其義方之訓

魏王泰太宗第二子也貞元十四年太宗幸泰延康坊宅因曲赦雍州及長安大辟罪已下免延康坊百姓無出今年租賦又賜泰府官僚帛有差泰好士愛文學特令就府別置文學館任自引召學士又以泰腰腹洪大

趨拜稍難復令乘小輿至於朝所其寵異如此

營州都督晦河間王孝恭子也乾封中以善政聞璽書
勞問賜物三百段

紀王慎太宗第十子為襄州刺史以善政稱高宗璽書
勞勉

宋王憲初名成器睿宗長子睿宗將建儲貳以成器嫡
長而玄宗有平韋氏之功成器涕泣固讓儲副玄宗又
抗表固讓睿宗不許乃下制曰左衛將軍宋王成器朕

之元子當踐副君以隆基有社稷大功人神僉屬繇是
朕前懇讓言在必行天下至公誠不可奪爰示立季之
典庶叶從人之願可雍州牧揚州大都督太子太師別
加實封二千戶賜物五千段細馬二十匹奴婢十房甲
第一區良田三十頃其年十一月拜尚書左僕射尋遷
司徒景雲二年兼同州刺史賜物二千段殿中馬二十
匹開元二十八年冬憲寢疾玄宗令中使送醫藥及珍
膳相望於路僧崇一療憲稍瘳帝大悅特賜緋袍魚袋

以賞異崇一時申王等皆先薨唯憲獨在上尤加恩貸
每年至憲生日必幸其宅移時晏樂居常無日不賜酒
酪及異饌等尚食摠監及四方有所進獻食之稍甘即
皆分以賜之憲嘗奏請年終錄付史官每年數百紙
汝陽王璿憲子也天寶九載薨輟朝一日制曰睦親之
恩理貫存沒飾終之禮義表哀榮故特進上柱國汝陽
郡王璿植性謙和執心恭懿聞詩禮而稟訓用忠信而
飭躬修詞立誠不虧於道依仁游藝克著於名况久踐

崇班彌彰勤勵冀其永固藩翰有光公族奄茲殞歿良多憫念宜加寵贈用旌幽宥可贈太子太師應治喪量事官供仍令京兆尹一人簡校葬事

嗣申王珣憲子

珣出繼申王

開元二十五年薨玄宗甚悼之

輟朝三日制曰猶子之恩特深於情禮睦親之義必備於哀榮同安郡王珣稟氣淳和執心忠順邦國垣翰宗枝羽儀磐石疏封將期永固逝川不舍俄歎促齡悼往之懷因心所切宜增寵命用飾幽泉可贈太子少保葬

事官給陪葬橋陵

榮王滉

後名玗

玄宗開元十五年授京兆牧二十三年七月以

京兆牧榮王滉廣州都督光王浚

後名珪

河南牧儀王澹

後名璿

荊州大都督永王澤

後名璘

益州大都督壽王清

後名瑁

安西

大都護延王湏

一作洄後名玢

揚州大都督盛王沐

後名琦

第二

十二男濟王溢

後名環

第二十三男信王沔

後名璿

第二十四

男義王漼

後名玘

第二十五男陳王渙

後名珪

並加開府儀

同三司第二十六男豐王澄

後名珙

為左衛大將軍第二

十七男恒王漣

後名真

為右衛大將軍第二十九男涼王澁

後名

璿為左千牛衛大將軍第三十男汴王滔

後名璿

為右千

牛衛大將軍滉等謝恩於朝悉命詣尚書省上自慶王

以下咸送之命有司設帳置饌太常供樂敕曰滉王滉等既

已封建近又拜官在於府寮合依典故有司准式十二月慶

王潭忠王浚棣王洽鄂王涓榮王滉儀王濰潁王灃永

王澤壽王清延王涸盛王沐濟王溢義王淮陳王渙豐

王澄常王漣涼王澁汴王滔加上柱國

王男太常卿真定郡王償永王男太常卿餘姚郡王償
陳王男殿中監安南郡王倫穎王男鴻臚卿高邑郡王
僖延王男殿中監平陽郡王佺信王男光祿卿晉陵郡
王侗豐王男宗正卿齊安郡王佻豐王男太僕卿宜春
郡王佑盛王男殿中監信都郡王佩壽王男鴻臚卿廣楊
郡王堪義王男宗正卿高密郡王倬涼王男殿中監安
定郡王仕延王男太僕卿佐永王男國子祭酒儀棣王
男秘書監僕靖德太子男太僕卿韓國公備靖德太子

男太僕卿倫棣王男光祿卿安棣王男太僕卿僚棣王

男國子祭酒俠棣王男殿中監仁棣王男太僕卿

史失其名

棣王男秘書監儉永王男衛尉卿莒國公偵永王男秘

書監邲國公儼永王男國子祭酒伶壽王男光祿卿薛

國公仇壽王男殿中監滕國公侑壽王男國子祭酒儼

延王男宗正卿魯國公倜延王男國子祭酒荆國公偃

濟王男衛尉卿沛國公佺濟王男國子祭酒俸信王男

秘書監吳國公保信王男國子祭酒越國公佖義王男

國子祭酒曹國公佳義王男秘書監魏國公俗陳王男
秘書監代國公仿陳王男太僕卿代國公倅儀王男光
祿卿號國公供潁王男國子祭酒楚國公倪潁王男光
祿卿夔國公傅盛王男光祿卿徐國公俗盛王男國
子祭酒許國公係豐王男國子祭酒江國公佺涼王男
衛尉卿蒲國公佺涼王男秘書監鄭國公倅榮王男衛
尉卿源榮王男秘書監償榮王男鴻臚卿佩等五十五
人並授上柱國

韓王迥代宗第七子以母寵既生而受封雖冲幼恩在鄭王之亞

嗣吳王祇為檢校工部尚書兼太子賓客大歷五年詔祇集賢院待制時四郊無虞勲勞大臣在闕下者雖爵秩崇高多無職事永泰初乃詔左僕射裴冕等一十三人同於集賢院待制特給殮錢及繕修廨宇以厚其禮自後遷者非一無代之者以祇宗室勲舊加寵之也

宗正卿嗣吳王獻貞元十三年奏簡王府諮議叅軍

嗣寧王子淑葬請鹵簿宰臣等議以子淑官卑不合
給因下詔自今以後嗣王薨日宜令所司供鹵簿永為常式
梁廣王全昱太祖兄乾化元年還睢陽命內臣拜餞都
外親王出宿至於偃師仍詔其子衡王友諒侍從以歸
後唐開府儀同三司檢校太尉充北都留守興聖宮使
判六軍諸軍事兼御史大夫上柱國隴西縣開國伯食
邑七百戶繼岌同光元年授檢校太尉同中書門下平
章事仍進封開國侯加食邑三百戶充東京留守餘如

故繼岌皇子也魏州興建時宰相豆盧革奏曰皇子之職故事合帶宮使革因進擬以興聖為名

秦王從榮明宗長子也天成二年自鄴中至泊於至德宮帝幸其第宣禁中女伎及教坊樂歡宴至晚後為天下兵馬元帥四年九月勅從榮位隆將相望重盤維委任既崇等威合異班位宜在宰臣之上

亳州團練使重吉末帝子早薨清泰元年詔贈太尉仍令宋州選隙地置廟

洋王從璋明宗猶子清泰元年詔從璋及湮王從敏月各給俸錢一十萬米麥各五十石僦三十人衣糧馬五十匹芻粟二王自方鎮入朝自是留雒陽私第

隴西郡公重美末帝子清泰元年授成德軍節度等使命樞密使韓昭常送重美領鎮州旌節官牒於府署重美迎授其禮甚盛

晉皇子重信高祖第二子也高祖即位出鎮孟津到任踰月去民病十餘事朝廷有詔褒之是歲范延光叛命

於鄴詔遣前靈武節度張從賓發河橋屯兵東討延光
從賓與延光合謀為亂遂害重信於理所時年二十遠
近聞者為之歎惜制贈太尉執事奏曰兩漢子弟生死
無歷三公位者帝曰此兒為善被禍予甚愍之自我作
古寧有例乎遂行冊命

太師萬友高祖仲父太尉萬銓高祖季父太傅敬儒高
祖凡並天福六年正月追贈

周大將軍守筠奉超定哥皆太祖姪乾祐末遇害廣順

元年二月太祖姪守筠贈左領軍將軍改名愿奉起贈左監門將軍定哥贈左千牛將軍賜名遜顯德四年四月制曰故皇從弟贈左領軍衛將軍守愿贈左監門衛將軍奉起贈左千牛衛將軍遜等天潢演派棣萼騰芳咸敦悌之情並著謙和之譽頃因季代不享遐齡每念作辜難忘有慟宜加贈典復賁泉扃守愿可贈左衛大將軍奉起可贈左衛大將軍遜可贈左武衛大將軍

冊府元龜卷二百七十七

欽定四庫全書

冊府元龜卷二百七十八 宋 王欽若等 撰

宗室部

領鎮第一

自成周之世並建宗室漢有天下分王子弟皆受分器
列為戚藩曹魏革命無改前制西晉之後崇樹征鎮重
方面之寄總師兵之重繇是遠監前古內選於親出膺
督護之選以尸牧伯之任長人為政奉宣教條訓戎經

武式遏寇虜斯可以籍明茂之望聳懷柔之美夾輔京室克固於維城大庇本根以期於長世者已

晉太原成王輔宣王弟安平王孚第三子也咸寧三年監并州諸軍事

下邳獻王晃孚第五子也泰始九年詔曰南中郎將下邳王晃清亮中正體行明潔才周政理有文武策識其以晃為使持節都督寧益二州諸軍事安西將軍領益州刺史晃以疾不行更拜尚書遷右僕射久之出為鎮

東將軍都督青徐二州諸軍事

高陽元王珪字第七子也泰始初為北中郎將都督鄴城守諸軍事

竟陵王棼義陽王望子也齊王冏輔政以棼為平東將軍都督徐州諸軍事鎮下邳

彭城穆王權宣帝弟東武城侯馗之子泰始初出為北中郎將都督鄴城守諸軍事

權子元王植自侍中尚書出為安東將軍都督揚州諸軍事

代淮南王允鎮壽春未發或云植助允攻趙王倫遂以憂薨
權弟高密文獻王泰泰始初拜遊擊將軍出為兗州刺
史加鷹揚將軍遷使持節都督寧益二州諸軍事安西
將軍領益州刺史稱疾不行轉安北將軍代權督鄴城
守事遷安西將軍都督關中事後為鎮西將軍領護西
戎校尉假節代扶風王駿都督關中軍事以疾還京師
泰子孝王略自秘書監出為安南將軍持節都督河南
諸軍事遷安北將軍都督青州諸軍事懷帝即位遷使

持節都督荊州諸軍事征南大將軍開府儀同三司
略第南陽王模初封平昌公為北中郎將鎮鄴永興初成
都王穎故帳下督公師藩樓權郝昌等攻鄴模左右謀
應之廣平太守丁邵率衆救模范陽王虓又遣兗州刺
史苟晞援之藩等散走遷鎮東大將軍鎮許昌進爵南
陽王永嘉初轉征西大將軍開府都督秦雍梁益諸軍
事代河間王顥鎮關中

新蔡武哀王騰高密王泰第二子出繼叔父悌自太常

轉持節寧北將軍都督并州諸軍事并州刺史永嘉初
遷車騎將軍都督鄴城守諸軍事鎮鄴

范陽王虓康王綏之子累遷尚書出為安南將軍都督
豫州諸軍事持節鎮許昌進位征南將軍

譙閔王承剛王遜之子元帝欲樹藩屏會王敦表以宣
城內史沈充為湘州帝謂承曰湘州南楚險固在上流
之要控三州之會是用武之國也今以叔父居之何如
承曰臣幸托末屬身當宿衛未有驅馳之勞頻受過厚

之遇夙夜自勵思報天德君之所命惟力是視敢有辭
焉然湘州蜀寇之餘人物凋盡若上憑天威得之所益
比及三年請從戎役若未及此雖復灰身亦無益也於
是詔曰夫王者體天理物非羣才不足濟其務外建賢
哲以樹風聲內睦親親以廣藩屏是以太公封齊伯禽
居魯此先王之令典古今之通議也我晉開基列國相
望乃授琅邪武王鎮統東夏汝南文武懋一淮許扶風
梁王迭據關右爰暨東嬴作司并州今公族雖寡不逮

曩時豈得替舊章乎散騎常侍左將軍譙王承貞素欵
亮志存忠恪便蕃左右恭肅彌著今以承監湘州諸軍
事南中郎將湘州刺史初劉隗以王敦威權太盛終不
可制勸帝出諸心腹以鎮方隅故先以承為湘州

承孫敬王恬為侍中左衛將軍恬既宗室有勲望孝武
帝時深仗之以為都督兗青冀幽并揚州之晉陵徐州
之南北郡軍事領鎮北將軍兗青二州刺史假節

恬子休之少仕清塗以平王恭庾楷功拜龍驤將軍襄

城太守鎮歷陽桓玄攻歷陽休之嬰城固守及兄尚之
為桓玄所敗休之以五百人出城力戰不捷乃還城携
子姪奔於慕容超聞義軍起復還京師大將軍武陵王
令曰前龍驤將軍休之才幹貞審功業既成歷陽之戰
事在幾捷及至勢乖力屈奉身出奔猶鳩集義徒崎嶇
險阻既應親賢之舉宜委分陝之重可監荆益梁寧秦
雍六州軍事領護南蠻校尉荊州刺史假節

汝南文成王亮宣帝子初封扶風郡王持節都督關中

雍涼諸軍事吳將步闡來降假亮節都督諸軍事以納
之後為大司馬假黃鉞大都督督豫州諸軍事出鎮許
昌

琅邪武王伷宣帝子魏末為撫軍將軍南皮伯出為鎮
東大將軍假節徐州諸軍事代衛瓘鎮下邳伷鎮撫有
方得將士死力吳人憚之加開府儀同三司改封琅邪
王以東莞益其國頃之并督青州諸軍事

扶風武王駿宣帝子初封汝陰王都督豫州諸軍事吳

將丁奉寇芍陂駿督諸軍事拒退之遷使持節都督揚
州諸軍事代石苞鎮壽春尋復都督豫州還鎮許昌遷
鎮西大將軍使持節都督雍梁等州諸軍事代汝南王
亮鎮關中

駿子新野莊王歆初封新野縣公齊王囧入雒歆躬貫
甲冑率所領導囧以勲進封新野郡王邑二萬戶遷使
持節都督荊州諸軍事鎮南大將軍開府儀同三司

梁孝王彤宣帝子泰始中為北中郎將督鄴城守事太

康中代孔洵監豫州軍事加平東將軍鎮許昌頃之又
以本官代下邳王晃監青州軍事進號安東將軍元
康初轉征西將軍代秦王東都督關中軍事領護西戎
校尉加侍中進督梁州復為征西大將軍代趙王倫鎮
關中都督涼雍諸軍事又領西戎校尉屯好畤

趙王倫宣帝子咸寧中為平北將軍督鄴城守事元康
初遷征西將軍開府儀同三司鎮關中

齊獻王攸文帝子太康三年詔曰古者九命作伯或入

毗朝政或出御方嶽周之呂望五侯九伯實得征之侍
中司空齊王攸明德清暢忠允篤誠以母弟之親受台
輔之任佐命立勲劬勞王室宜登顯位以稱具瞻其以
為大司馬都督青州諸軍事侍中如故假節將本營千
人親騎帳下司馬大車皆如舊增鼓吹一部官騎滿二
十人置騎司馬五人餘王者詳案舊制施行

攸子武閔王問為翊軍校尉趙王倫密與相結廢賈后
以功轉游擊將軍問以位不滿意有恨色孫秀微覺之

且憚其在內出為平東將軍假節鎮許昌

同弟實永寧初為東平將軍假節加散騎常侍代齊王
問鎮許昌尋進安南將軍都督豫州軍事

燕王機文帝子咸寧初徵為步兵校尉以漁陽郡益其
國加侍中之服拜青州都督鎮東將軍假節以北平上
谷廣寧郡增燕國

樂安平王鑒文帝子元康中以大將軍使持節都督豫
州軍事安南將軍代清河王遐鎮許昌

楚隱王壽武帝子太康末之國都督荊州諸軍事平南
將軍轉鎮南將軍

淮南忠壯王允武帝子太康十年之國都督揚江二州
諸軍事鎮東大將軍假節

清河康王遐武帝子自散騎常侍平南將軍都督江州
諸軍事

成都王穎武帝子為散騎常侍車騎將軍賈謚嘗與皇
太子博爭道穎在坐厲聲呵謚曰皇太子國之儲君賈

謚何得無禮謚懼繇此出穎為平北將軍鎮鄴

河間王顥太原烈王瓌之子元康初為北中郎將監鄴城九年代梁王彤為平西將軍鎮關中石函之制非親親不得都督關中顥於諸王為踈特以賢舉

東海孝獻王越高密王泰子初以世子為騎都尉太安初惠帝北征鄴以越為大都督六軍敗越奔下邳徐州都督東平王楨不納越徑還東海懷帝即位委政於越帝始親萬幾留心庶事越不悅求出藩帝不許越遂出

鎮許昌尋詔越為丞相領兗州牧都督兗豫司冀幽并
六州越辭丞相不受自許遷於鄆城

琅邪孝王裒元帝子自後將軍拜散騎常侍使持節都
督青徐兗三州諸軍事車騎將軍

會稽文孝王道子簡文帝子為開府司徒及謝安薨詔
曰新喪哲輔華戎未一自非朝賢懋德莫能綏御內外
司徒琅邪王道子體道自然神識穎遠實當旦奭之重
宜總二南之任可領揚州刺史錄尚書假節鉞都督中

外諸軍事衛府文武一以配驃騎府讓不受數年領徐州刺史道子世子元顯為司徒錄尚書事求領徐州刺史加侍中後將軍開府儀同三司都督十六州諸軍事宋長沙景王道憐高祖中弟也晉末高祖鎮京口以道憐為龍驤將軍領堂邑太守戍石頭會鮮卑侵逼自彭城以南民皆保聚山陽淮陰諸戍並不復立道憐請據彭城以漸修創朝議以彭城懸遠使鎮山陽進號征虜將軍督淮北軍事北東海太守并州刺史加北徐州刺

史移鎮彭城又徵為都督兗青二州晉陵京口淮南諸
軍郡事兗青二州刺史還鎮京口及江陵平以為都督
荆湘益秦寧梁雍七州諸軍驃騎將軍開府儀同三司
鎮護南蠻校尉荊州刺史北府文武皆配之高祖平定
三秦方思外略徵道憐還為侍中都督徐兗青三州揚
之晉陵諸軍事守尚書令徐兗二州刺史持節將軍如
故元興元年解尚書令進位司空出鎮京口

長沙成王義欣道憐長子也初為征虜將軍青州刺史

魏郡太守戍石頭文帝元嘉三年為南兖州刺史七年遷
使持節監豫司雍并四州諸軍事豫州刺史給鼓吹一
部鎮壽陽十年進號鎮軍將軍進監為都督義欣子祗
明帝初為南兖州刺史

祗弟韞自太子中庶子侍中加荆湘南兖州刺史吳興
太守侍中領左軍將軍又改領驍騎將軍撫軍雍州刺
史

新渝侯義宗義欣弟也元嘉中為征虜將軍南兖州刺

史

當陽侯東義宗子也泰始中為左衛將軍丹陽尹五年出為前將軍淮南宣城太守不拜還復本任遷使持節都督南徐徐兗豫青冀六州諸軍事後將軍南徐州刺史廢帝即位改都督郢州豫州之西陽司州之義陽二郡諸軍事郢州刺史未拜留為尚書左僕射叅選二年加散騎常侍丹陽尹

興安侯義賓義宗弟也元嘉中位至輔國將軍徐州刺

史

營道侯義綦義賓弟也元嘉中歷右衛將軍湘州刺史
臨澧侯襲為安成太守晉安王子勛為逆襲據郡拒之
子勛遣軍攻圍不下明帝嘉之以為郢州刺史

臨川烈武王道規高祖少弟晉末為振武將軍義昌太
守累戰功進號輔國將軍督淮北諸軍事并州刺史時
荊州湘江豫猶多桓氏餘燼往往屯結復以本官進督
江州之武昌荊州之江夏隨郡義陽綏安豫州之西陽

汝南潁川新蔡九郡諸軍事隨宜翦撲皆悉平之遷使
持節都督荆寧秦梁雍等州司州之河南諸軍事領護
南蠻校尉荊州刺史進號西征大將軍開府儀同三司
加散騎常侍固辭俄而寢疾改授都督豫章江州揚州
之宣城淮南廬江歷陽安豐堂邑六郡諸軍事豫州刺
史持節常侍如故以疾不拜

臨川康王義慶晉末從高祖征長安還拜輔國將軍北
青州刺史未之任徙督豫州諸軍事豫州刺史復督淮

北諸軍事遷丹陽尹在京尹九年出為使持節都督荆
雍益寧梁南北秦七州諸軍事平西將軍荊州刺史荆
州居上流之重地廣兵強資實兵甲居朝廷之半故高
祖使諸子居之義慶以宗室令美故特有此授十六年
改授散騎常侍都督江州之西陽晉熙新蔡三州諸軍
事衛將軍江州刺史持節如故十七年即本號都督南
兖州徐兖青冀幽六州諸軍事南兖州刺史

營浦侯遵考高祖族弟也晉末自建威將軍彭城內史

隨高祖北伐時高祖諸子並弱宗室唯有遵考長安平
定以督并州司州之北河東北平陽北雍州之新平安
定五郡諸軍事輔國將軍并州刺史領河東太守鎮蒲
坂關中失守南還元嘉三年出為使持節都督雍梁南
北秦四州荊州之竟陵順陽襄陽新野隨六郡諸軍事
征虜將軍寧蠻校尉雍州刺史襄陽新野二郡太守八
年督南徐兖州之江北海南諸軍事征虜將軍南兖州
刺史領廣陵太守十五年監徐兖二州豫州之梁郡諸

軍事前將軍徐兗二州刺史未之鎮留為侍中領左衛將軍明年出為使持節監豫司雍并四州南豫州之梁郡弋陽馬頭荊州之義陽四郡諸軍事豫州刺史領南梁郡太守遷吳興太守秩中二千石二十七年魏軍南至瓜步率軍出江上假節蓋三十年復出為使持節監豫州刺史元亮立遣外監徐安期仰捷祖防守之遵考斬安期等起義兵應南譙王義宣加遵考鎮西將軍孝建元年除吳興太守明年徵為湘州刺史三年轉丹陽尹

六年領徐州刺史景和元年出督南豫州諸軍事安西將軍南豫州刺史遵考從弟思考為豫章會稽太守益徐州刺史凡經十郡三州

廬陵孝獻王義真武帝第二子晉末從高祖北征及關中平定高祖議欲東還而諸將行役既久咸有歸願止留偏將不足鎮固人心乃以義真行都督雍梁秦三州之河東平陽河北三郡諸軍事安西將軍領護西戎校尉雍州刺史太尉諮議叅軍京兆王修為長史委以關

中任高祖將還三秦父老詣門流涕訴曰殘民不沾王
化於今百年矣始覩衣冠方仰聖澤長安十陵是公家
墳墓咸陽宮殿數千間是公家屋宅捨此欲何之高祖
為之愍然慰辭曰受命朝廷不得擅留感諸君戀本之
意今留第二兒令文武賢才共鎮此境臨還自執義真
手以授王修令修執其子孝孫手以授高祖義真尋除
正加節又進督并東秦二州司州之東安定新平二郡諸
軍事領東秦州刺史次復都督司雍秦并梁五州諸軍

事建武將軍司州刺史持節如故時義真將鎮雒陽而河南蕭條未及修理改除揚州刺史鎮石頭永初元年移鎮東城高祖不豫以為使持節侍中都督南豫豫雍司秦并六州諸軍事車騎將軍開府儀同三司南豫州刺史出鎮歷陽

襲廬陵王紹文帝第五子元嘉二十年出為南中郎將江州刺史時年十二二十二年入朝加榮戟進都督江州豫州之西陽晉熙新蔡三郡諸軍事在任七年改授

左將軍南徐州刺史給鼓吹一部未之鎮乃遷揚州刺史

彭城王義康武帝第四子晉末年十二宋臺除都督豫
司雍并四州諸軍事冠軍將軍豫州刺史時高祖自壽
陽被徵入輔留義康代鎮壽陽又領司州刺史進督徐
州之鍾離荊州之義陽諸軍事永初二年徙監南豫司
雍并五州諸軍事南豫州刺史三年遷使持節都督南
徐兗二州揚州之晉陵諸軍事南徐州刺史太祖即位

元嘉三年改授都督荆湘雍梁益寧南北秦八州諸軍
事荆州刺史班劍三十人六年司徒王弘表義康宜還
入輔徵侍中都督揚南徐兗三州諸軍事司徒録尚書
事領平北將軍南徐州刺史持節如故九年又領揚州刺史
江夏文獻王義恭武帝第五子景平二年監南豫豫司雍
秦并六州諸軍事冠軍將軍南豫州刺史代廬陵王義
真鎮歷陽時年十二元嘉元年加使持節進號撫軍將
軍給鼓吹一部三年監南徐兗二州揚州之晉陵諸軍

事徐州刺史進監為都督未之任太祖征謝晦義恭還鎮京口六年改都督荆湘雍益梁寧南北秦八州諸軍事荊州刺史九年徵為都督南充徐兗青冀幽六州豫州之梁郡諸軍事征北將軍開府儀同三司南充州刺史鎮廣陵十七年大將軍彭城王義康有罪出藩徵義恭為侍中都督揚南徐兗三州諸軍事給班劍二十人置仗加兵二十七年春後魏寇豫州太祖因此欲開定河雒其秋以義恭總統羣帥出鎮彭城後以本官領南

兗州刺史增督南兗豫徐青冀司雍秦幽并十一州
諸軍事并前三州移鎮盱眙修治館宇擬制東城二
十九年遭太妃憂改授大將軍都督揚南徐二州諸軍
事南徐州刺史還鎮東府世祖踐祚授使持節侍中都
督揚南徐二州諸軍事太尉錄尚書六條事南徐徐二
州刺史孝建元年十一月還鎮京口二年春進督東南
兗二州其冬徵為揚州刺史

南豐縣王朗字元明義恭長子為湘州刺史持節侍中

領射聲校尉

襲江夏王子綏為都督郢州諸軍事冠軍將軍郢州刺史進號後軍將軍加持節

襲江夏王躋後廢帝即位督會稽東陽新安臨海永嘉五郡諸軍事東中郎將會稽太守進號左將軍

襲江夏王伯禽官至輔國將軍湘州刺史

南郡王義宣武帝第六子元嘉元年年十二拜左將軍鎮石頭七年遷使持節都督徐兗青冀幽五州諸軍事徐

州刺史猶戍石頭八年改都督南充州刺史當鎮山陽未行明年遷中書監進號中軍將軍又領石頭戍事十三年出都督江州豫州之西陵晉熙新蔡三郡諸軍事鎮南將軍江州刺史初高祖以荊州上流形勝地廣兵強遺詔諸子次第居之謝晦平後以授彭城王義康義康入相次江夏王義恭又以臨川王義慶宗室令望且臨川武烈王有大功於社稷義慶又居之其後應在義宣帝以義宣人才素短不堪居上流十六年以衡陽王

義季代義慶而以義宣代義季為南徐州刺史都督南徐州軍事征北將軍加散騎常侍而會稽公主每以為言帝遲回久之二十一年乃以義宣都督荆雍益梁寧南北秦七州諸軍事車騎將軍荊州刺史進位司空改侍中領南蠻校尉三十年遷司徒中軍將軍揚州刺史世祖即位以義宣為中書監都督揚豫二州丞相錄尚書六條事揚州刺史加羽葆鼓吹給班劍四十人持節侍中如故封次子宜陽侯愷為南譙王義宣固辭內任

及愷王爵於是改授都督荆湘雍益梁寧南北秦八州諸軍事荆湘二州刺史持節侍中丞相如故

衡陽文王義季武帝第七子元嘉八年領石頭戍事九年遷使持節都督南徐州諸軍事右將軍南徐州刺史十六年代臨川王義慶都督荆湘雍益梁寧南北秦八州諸軍事安西將軍荊州刺史二十一年為都督南兗徐青冀幽六州諸軍事征北大將軍開府儀同三司南兗州刺史二十二年進督豫州之梁郡遷徐州刺史

始興王濬文帝第二子初鎮京口後求鎮江陵尚書令何尚之等咸謂濬太子次第不應遠出文帝以上流之重宜有至親故以濬為衛將軍開府儀同三司荊州刺史加都督領護南蠻校尉

南平穆王鑠文帝第四子元嘉十七年都督湘州諸軍事冠軍將軍湘州刺史不之鎮戍石頭事二十二年遷使持節都督南豫豫司雍秦并六州諸軍事南豫州刺史時太祖方事外畧乃罷南豫併壽陽郡鑠為豫州刺

史

竟陵王誕文帝第六子元嘉二十二年監南兖州諸軍
事北中郎將南兖州刺史出鎮廣陵尋以本號徙南徐
州刺史二十六年出為都督雍梁南北秦四州荊州之
竟陵隨二郡諸軍事後將軍雍州刺史遷都督廣交二
州諸軍事安南將軍廣州刺史當鎮始興未行改授都
督會稽東陽新安臨海永嘉五郡諸軍事安東將軍會
稽太守給鼓吹一部孝武即位徵為持節都督荆湘雍

益梁寧南北秦八州諸軍事衛將軍開府儀同三司荆
州刺史南譙王義宣不肯就徵以誕為侍中驃騎大將
軍揚州刺史建平二年出為使持節都督南充徐二州
諸軍事太子太傅南徐州刺史大明元年又出為都督
南充南徐青冀幽六州諸軍事南充州刺史

建平宣簡王宏文帝第七子元嘉二十四年為中護軍
領石頭戍事出為征虜將軍江州刺史

宏子景素初為寧朔將軍監南豫豫二州諸軍事輔國將軍

南豫州刺史不拜太宗初加冠軍將軍南充州刺史丹陽尹吳興太守使持節監湘州諸軍事湘州刺史秦始六年都督荆湘雍益梁寧南北秦八州諸軍事為散騎常侍後將軍太常未拜授使持節都督南徐兗青冀六州諸軍鎮軍將軍南徐州刺史

廬江王綈文帝第八子元嘉二十六年以為侍中後軍將軍領石頭戍事出為會稽太守二十九年遷使持節都督廣交二州荊州之始興臨安二郡諸軍事車騎將軍平越

中郎將廣州刺史孝武踐祚復為會稽太守加撫軍將軍
明年徵為秘書監加散騎常侍尋出為撫軍將軍江州
刺史進號平南將軍置吏大明二年徵為散騎常侍中
書令領驍騎將軍給鼓吹一部又出為南豫州刺史

晉熙王昶文帝第九子世祖踐祚自太常出為東中郎
將會稽太守監會稽東陽臨海永嘉新安五郡諸軍事
孝建元年立東陽州拜昶為刺史大明中都督江州鄆
州之西陽豫州之新蔡晉熙二郡諸軍事前將軍江州

刺史前廢帝即位出為使持節都督徐兗南兗青冀幽
六州豫州之梁郡諸軍事征北將軍徐州刺史

武昌王渾文帝第十子孝武即位授征虜將軍南彭城
東海二郡太守出鎮京口孝建元年遷持節監雍梁南
北秦四州荊州之竟陵隨二郡諸軍事寧蠻校尉雍州
刺史

冊府元龜卷二百七十八

欽定四庫全書

冊府元龜卷二百七十九宋 王欽若等 撰

宗室部

領鎮第二

宋始安王休仁文帝第十二子孝建三年都督南兗徐
二州諸軍事冠軍將軍兗州刺史大明元年入為侍中
四年出為湘州刺史加號平南將軍八年遷使持節督
江州南豫州之晉熙新蔡郢州之西陽三郡諸軍事安

南將軍江州刺史未拜前廢帝景和元年遷使持節都督雍梁南北秦四州諸軍事安西將軍寧蠻校尉雍州刺史未之任留為散騎常侍護軍將軍太宗立以為使持節侍中都督揚南徐二州諸軍事司徒尚書令揚州刺史薛安都據彭城招引後魏復都督北討諸軍事時豫州刺史殷琰據壽春未平晉平王休祐先督征討諸軍事休祐出領江陵休仁又代督西討諸軍事泰始五年進都督豫司二州休仁子伯融歷南豫州刺史琅琊

臨淮二郡太守寧朔將軍廣州刺史不之職

晉平刺王休祐文帝十三子大明元年領長安校尉遷
東揚州刺史未拜徙湘州刺史加號征虜將軍四年為
使持節都督豫司二州南豫州之梁郡諸軍事右將軍
豫州刺史明帝定亂以為使持節都督荆湘雍益梁寧
南北秦八州諸軍事驃騎大將軍荊州刺史改都督江
郢雍湘等州江州刺史又改都督江南豫司州南豫州
刺史又改都督豫江司三州豫州刺史時豫州刺史殷

琰據壽春反叛休祐出鎮歷陽督劉勔等討琰琰未平勔築長城守之休祐復徙都督荆湘雍益梁寧南北秦八州諸軍事荊州刺史泰始六年徵為都督南徐南兗徐兗青冀六州諸軍事南徐州刺史加侍中帝以休祐貪虐不可蒞民留之京邑遣上佐行府州事

休祐子宣翊為寧朔將軍湘州刺史未拜免

海陵王休茂文帝第十四子大明二年以為使持節都督雍梁南北秦四州郢州之竟陵隨二郡諸軍北中郎

將寧蠻校尉雍州刺史

桂陽王休範文帝第十八子大明三年出為江州刺史
明帝定亂以為使持節都督南徐州未拜以驃騎大將
軍還為江州進督越州諸軍事

巴陵哀王休若文帝第十九子大明四年出為都督徐
州諸軍事增督豫州之梁郡明年徵為散騎常侍左右
郎將吳興太守復徵為散騎常侍明帝泰始元年出為
使持節都督會稽東陽永嘉臨海新安五郡諸軍事領

安東將軍會稽太守率衆東討進督吳興晉陵二郡進
號衛將軍給鼓吹一部又進督晉安二郡諸軍事二年
遷督雍梁南北秦四州荊州之竟陵隨二郡諸軍事寧
蠻校尉雍州刺史四年遷使持節都督湘州諸軍事進
號征南將軍湘州刺史仍為都督荆湘雍益梁寧南北
秦八州諸軍事征西將軍荊州刺史六年荊州刺史晉
平王休祐入以休若監荊州事進號征南將軍湘州刺
史仍為都督荆湘雍益梁寧南北秦八州諸軍事征西

將軍荊州刺史七年被徵代休祐為都督南徐南兗徐
兗青冀六州諸軍事征北大將軍南徐州刺史

豫章王子尚孝武帝第二子孝建三年都督南徐南兗
二州諸軍事北中郎將南兗州刺史其年遷揚州刺史
大明二年加撫軍將軍三年浙江西立王畿以江東為
揚州子尚都督揚州江州之鄱陽晉安建安三郡諸軍事揚
州刺史五年改封豫州領會稽太守七年加使持節前
廢帝即位罷王畿復徵子尚都督揚南徐二州諸軍事

領尚書令解督東揚州

晉安王子勛孝武第三子大明四年都督南兖州徐州
之東海諸軍事征虜將軍南兖州刺史七年改督江州
南豫州之晉熙新蔡郢州之西陽三郡諸軍事前將軍
江州刺史八年遷使持節都督雍梁南北秦四州郢州
之竟陵隨二郡諸軍事鎮軍將軍寧蠻校尉雍州刺
史未拜以鎮軍將軍還為江州景和元年加使持節
松滋侯子房孝武第六子永光元年自宣城太守遷東

揚州刺史景和元年罷東揚州子房以本號督會稽東陽新安臨海永嘉五郡諸軍事會稽太守明帝即位改督為都督進號安東將軍

臨海王子頊孝武第七子大明五年自吳興太守遷使持節都督廣交二州湘州之始興始安臨賀三郡諸軍事征虜將軍平越中郎將廣州刺史未之鎮徙荊州刺史廢帝即位以本號都督荆湘雍益梁寧南北秦八州諸軍事刺史如故明帝即位解督雍州以為鎮軍丹陽

尹尋留本任進督雍州

始平孝敬王子鸞孝武第八子大明五年自吳郡太守
遷北中郎將南徐州刺史領南琅邪太守六年加都督
南徐州諸軍事八年加中書令領司徒前廢帝即位解
中書令領司徒加持節之鎮

永嘉王子仁孝武第九子大明五年年五歲監雍梁南
北秦四州郢州之竟陵隨二郡諸軍事北中郎將寧蠻校尉
雍州刺史遷東中郎將吳郡太守六年又遷丹陽尹前

廢帝即位加征虜將軍領衛尉尋出為左將軍南兖州
刺史景和元年遷南徐州刺史泰始中四方平定以為
使持節都督湘廣交三州諸軍事平南將軍湘州刺史
始安王子真孝武第十一子大明七年自吳興太守遷
使持節監廣交二州始興始安臨賀三郡諸軍事平越
中郎將廣州刺史不之鎮遷征虜將軍南彭城太守領
石頭戍事景和元年為丹陽尹尋為南兖州刺史

邵陵王子元孝武第十三子景和元年出為湘州刺史

晉熙王燮明帝第六子元徽元年年四歲以為使持節
監郢州豫州之西陽司州之義陽二郡諸軍事征虜將軍
郢州刺史以黃門郎王真為長史摠府州之任明年太
尉江州刺史桂陽王休範舉兵逼朝廷燮遣中兵叅軍
馮景祖襲潯陽休範留中兵叅軍毛思連州別駕程罕
之居守開門詣景祖降進燮號安西將軍加督江州諸
軍事四年又進燮鎮西將軍加鼓吹一部順帝即位徽
為使持節督揚南徐二州諸軍事撫軍將軍揚州刺史

先是齊世子蕭贖為燮安西長史行府州事時亦被徵為左衛將軍與燮俱下會荊州刺史沈攸之舉兵反世子因奉燮鎮潯陽之盆城據中流為內外形援攸之平燮還京邑齊王蕭道成為南徐州燮解督南徐進督南豫江州諸軍事號中軍將軍儀同三司

邵陵殤王友明帝第七子元徽二年年五歲出為使持節督江州豫州之西陽新蔡晉熙三郡諸軍事南中郎將江州刺史順帝即位進號左將軍改為郡都督昇明

二年徙都督南豫豫司三州諸軍事安南將軍南豫州刺史歷陽太守

武陵王贊明帝第九子元徽四年出為使持節南徐兗青冀等州諸軍事北中郎將南徐州刺史順帝昇明元年遷持節督郢州司州之義陽諸軍事前將軍郢州刺史二年為沈攸之所圍徙督荆湘雍益梁寧南北秦八州諸軍事安西將軍荊州刺史攸之平乃之鎮

隨陽王翽明帝第十子昇明元年為使持節督郢州司

州之義陽諸軍事西中郎將郢州刺史未拜徙督湘州
諸軍事南中郎將湘州刺史

南齊豫章文獻王嶷太祖第二子太祖為宋相嶷出鎮
東府加冠軍將軍出為使持節都督江州豫州之新蔡
晉熙二郡軍事左將軍江州刺史徙都督荆湘雍益梁
寧南北秦八州諸軍事鎮西將軍荊州刺史持節太祖
即位遷侍中尚書令都督揚南徐二州諸軍事驃騎大
將軍開府儀同三司揚州刺史會北邊騷動帝思為經

略乃詔曰西關摠司王畿誠為治要荆楚領馭遐遠任寄弘隆自頃公私彫盡綏撫之宜尤重恒日復以為都督荆湘雍益梁寧南北秦八州諸軍事南蠻校尉荆湘二州刺史入為都督揚南徐二州諸軍事中書監司空揚州刺史

臨川獻王映太祖第三子宋末沈攸之事難作太祖時領南徐州以映為寧朔將軍鎮京口事寧除淮南宣城二郡太守並不拜仍為假節都督南充充徐青冀五州諸

軍事行兗州刺史復為冠軍將軍南兗州刺史太祖踐
阼以映為使持節都督荆湘雍益梁寧南北秦八州諸
軍事平西將軍荊州刺史又領湘州刺史不行改授散
騎常侍都督揚南徐二州諸軍事前將軍揚州刺史出
為都督荆湘雍益梁巴寧南北秦九州諸軍事鎮西將
軍荊州刺史

長沙威王晃太祖第四子宋順帝昇明二年自寧朔將
軍淮南宣城二郡太守遷為持節監豫司二州之西陽

諸軍事西中郎將豫州刺史尋遷使持節都督南徐兗
二州諸軍事後將軍南徐州刺史世祖加晃鎮軍將軍
轉丹陽尹

武陵昭王暕太祖第五子建元三年出為持節都督會
稽東陽新安永嘉臨海五郡軍事會稽太守世祖以暕
為江州刺史又為丹陽尹

安成恭王暕太祖第六子建元二年除冠軍將軍鎮石
頭戍領軍事四年出為使持節督江州豫州之晉熙諸

軍事南中郎將江州刺史永明六年為南徐州刺史九年遷散騎常侍秘書監領石頭戍事

鄱陽王鏘太祖第七子建元四年世祖即位以鏘為使持節督雍梁南北秦四州郢州之竟陵司州之隨郡軍事北中郎將寧蠻校尉雍州刺史七年轉征虜將軍丹陽尹尋加散騎常侍特進號撫軍出為江州刺史九年始親府州事加使持節督江州諸軍事安南將軍

桂陽王鑠字宣朗太祖第八子永明二年出為南徐州

刺史鎮京口歷代鎮府鑠出蕃始省軍府

始興簡王鑑太祖第十子永明二年世祖始以鑑為持節都督益寧二州軍事前將軍益州刺史八年進號安西將軍明年為散騎常侍秘書監領石頭戍事

衡陽王鈞太祖第十一子出繼元王道度永明四年為江州刺史累遷左衛將軍為世祖所知兄弟中意遇次鄱陽王鏘十年轉中書令領石頭戍事

江夏王鋒太祖第十二子永明七年自輔國將軍南彭

城平昌二郡太守遷左衛將軍仍轉侍中領石頭戍事九年出為徐州刺史

南平王銳太祖第十五子永明十年出為持節都督湘州諸軍事南中郎將湘州刺史

宜都王鏗太祖第十六子永明十一年為持節都督南豫司二州軍事冠軍將軍南豫州刺史

晉熙王鈇太祖第十八子隆昌元年出為持節都督郢司二州軍事冠軍將軍郢州刺史

河東王鉉太祖第十九子隆昌元年為驍騎將軍出為徐州刺史

竟陵文宣王子良世祖第二子宋末昇明三年為使持節都督會稽東陽臨海永嘉新安五郡輔國將軍會稽太守太祖建元二年穆妃薨去官仍為征虜將軍丹陽尹世祖即位以為使持節都督南徐兗二州諸軍事鎮北將軍南徐州刺史永明元年徙為侍中都督南兗徐青冀五州征北將軍南兗州刺史持節如故明年入為

護軍將軍兼司徒鎮西州十年領尚書令尋為使持節都督揚州諸軍事揚州刺史隆昌元年進督南徐州

廬陵王子卿世祖第三子世祖即位為使持節都督鄆州司州之義陽軍事冠軍將軍鄆州刺史永明元年徙都督荆湘益寧梁南北秦七州安西將軍荊州刺史十年遷使持節都督南豫司三州軍事驃騎將軍南豫州刺史

魚復侯子響世祖第四子永明三年自輔國將軍南彭

城臨淮二郡太守遷使持節都督豫州郢州之西陽汝南二郡軍事冠軍將軍豫州刺史四年進號右將軍進督南豫州之歷陽淮南潁川汝陽四郡尋出為江州刺史七年遷使持節都督荆湘雍梁寧南北秦七州軍事鎮軍將軍荊州刺史

安陸王子敬世祖第五子永明五年為都督荆湘梁雍南北秦六州軍事平西將軍荊州刺史十年轉散騎常侍撫軍將軍丹陽尹隆昌元年遷使持節都督南兗徐青冀五

州征北大將軍南兖州刺史

晉安王子懋世祖第七子永明三年為持節都督南豫
豫司三州南中郎將南豫州刺史魚復侯子響為豫州子
懋解督四年進號征虜將軍南豫新置力役寡少加子
懋宣城太守五年為監南兖兗徐青冀五州軍事後將
軍南兖州刺史六年徙監湘州平南將軍湘州刺史明
年加持節都督八年進號鎮南將軍九年親府州事十
一年為使持節都督雍梁南北秦四州郢州之竟陵司

州之隨郡軍事征北將軍雍州刺史隆昌元年為都督
江州刺史

隨郡王子隆世祖第八子永明六年自輔國將軍南琅
邪彭城二郡太守遷江州刺史未拜遷持節督會稽東
陽新安臨海永嘉五郡東中郎將會稽太守八年代魚
復侯子響為使持節都督荆雍梁寧南北秦六州鎮西
將軍荊州刺史其年始興王鑑罷益州進號督益州九
年親府州事

建安王子真世祖第九子永明四年自輔國將軍南琅邪彭城二郡太守遷持節督南豫司二州軍事冠軍將軍南豫州刺史領宣城太守進號南中郎將七年進號右將軍遷丹陽尹出為持節都督郢司二州軍事平西將軍郢州刺史

西陽王子明世祖第十子永明六年為持節都督南兗兗徐青冀五州軍事冠軍將軍南兗州刺史十年進左將軍督會稽東陽臨海永嘉新安五郡軍事會稽太守

南海王子罕世祖第十一子永明六年為北中郎將南琅邪彭城二郡太守帝初以白下地帶江山徙琅邪郡自金城治之子罕始鎮此城十年為持節都督南兗兗徐青冀五州軍事征虜將軍南兗州刺史

巴陵王子倫世祖第十三子永明七年為持節都督南豫司二州軍事南中郎將南豫州刺史十年遷北中郎將南琅邪彭城刺史二郡太守

始定王遙光太祖次兄貞王道生之孫明帝欲即位誅

賞事唯遙光共謀議建武元年以為持節都督揚南徐
二州諸軍事前將軍揚州刺史無子以江陵公寶覽為
後永元二年為持節督湘州輔國將軍湘州刺史

遙光弟遙欣延興元年明帝樹置以遙欣為持節督兗
州緣淮軍事寧朔將軍兗州刺史仍為督豫州之西陽
司州之汝南二郡輔國將軍豫州刺史未之任建武元
年進號西中郎將遷使持節都督荆雍益寧梁南北秦七
州軍事右將軍荊州刺史明帝子弟弱小晉安王寶義

有廢疾故以遙光為揚州居中遙欣居陝西在外權勢
并在其門四年進號平西將軍永泰元年以雍州魏兵
至詔遙欣本官領刺史寧蠻校尉移鎮襄陽魏兵退不行
遙欣弟遙昌延興元元年除黃門侍郎未拜仍為持節督
郢司二州軍事寧朔將軍郢州刺史徙督豫州郢州之
西陽司州之汝南二郡軍事征虜將軍豫州刺史
桂陽王昭粲文惠太子第四子爵林王立以皇弟封永
嘉郡王南徐州刺史延興元年出為使持節都督荆雍

益寧梁南北秦七州軍事西中郎將荊州刺史

安陸昭王緬明帝弟永明二年自太子詹事出為會稽太守遷使持節都督雍梁南北秦四州荊州之竟陵司州之隨郡軍事左將軍寧蠻校尉雍州刺史

緬子寶暉嗣安陸王為持節都督湘州軍事輔國將軍湘州刺史

巴陵王昭秀文惠太子第三子隆昌元年為使持節都督荆雍益寧梁南北秦七州軍事西中郎將荊州刺史

巴陵隱王寶義明帝長子建武元年為持節都督揚南
徐州軍事前將軍揚州刺史寶義少有廢疾故止加除
授仍以始安王遙光代之轉寶義為右將軍領兵置佐
鎮石頭二年出為使持節都督南徐州軍事鎮北將軍
南徐州刺史東昏即位進征北大將軍始安王遙光誅
為都督揚南徐二州軍事驃騎大將軍揚州刺史

江夏王寶玄明帝第三子建武元年為征虜將軍領石
頭戍事為持節都督郢司二州軍事西中郎將郢州刺

史永泰元年還為前將軍領石頭戍事未拜永元元年
進車騎將軍代晉安王寶義為使持節都督南徐兗二
州軍事南徐兗二州刺史

廬陵王寶源明帝第五子建武元年為北中郎將鎮琅
邪城遷右將軍領石頭戍事仍出為使持節都督南兗
兗徐青冀五州軍事後將軍南兗州刺史徙為都督會
稽東陽臨海永嘉新安五郡軍事會稽太守

鄱陽王寶夤明帝第六子建武二年為北中郎將鎮琅

邪城明年出為持節都督江州軍事南中郎將江州刺史東
昏即位為使持節都督郢司二州軍事征虜將軍郢州刺
史永元二年徵為撫軍領石頭戍事未拜三年為車騎將
軍開府儀同三司鎮石頭和帝立西臺以寶賁為使持節
都督南徐兗二州軍事衛將軍南徐州刺史少帝以為
持節都督荆益寧雍梁南北秦七州軍事荊州刺史
邵陵王寶攸明帝第九子建武三年為北中郎將鎮琅
邪城永元元年為持節都督南北徐南兗青冀五州軍事

南充州刺史未拜遷征虜將軍領石頭戍事丹陽尹陳顯達平出為持節督江州軍事左將軍江州刺史

晉熙王寶嵩明帝第十子永元二年為冠軍將軍丹陽尹仍遷持節都督南徐兖二州軍事南徐州刺史將軍如故

桂陽王寶貞明帝第十一子永元二年為中護軍北中郎將領石頭戍事

冊府元龜卷二百七十九